



菩薩律儀二十頌

阿奢黎月官造 法尊法師譯

頂禮曼殊室利童子！

隨力而供養，敬禮佛菩薩。
住十方三世，諸菩薩尸羅，
一切福德藏，當以善意樂，
從有智有力，住律尊長受。
爾時令善增，諸佛及佛子，
善意恆於彼，眷念如愛子。
隨於自及他，雖苦若有利，
及利樂應作，不作樂無利。
謂由猛利惑，失壞戒律儀，
其罪有四種，意同他勝處。
由貪利敬故，自讚而毀他。
於有苦無怙，慳不捨財法。
由忿不受他，諫謝而打他。
謗毀於大乘，宣說相似法。
應更受律儀，中纏對三悔，
餘罪於一前，如染非自心。
不三供三寶，隨逐欲心轉，
不敬諸耆德，不正答他問。
不受他所請，拒不受金等，
不施於求法，棄捨犯戒者。

不學令他信，於利他少事，
悲愍無不善，忍受諸邪命。
掉舉輕躁等，思一向流轉，
不避護惡稱，雖有惑不治。
他罵報罵等，輕捨諸患者，
棄捨他諫謝，隨逐忿心轉。
為供事御眾，不除懈怠等，
貪說無義論，不求三摩地。
不捨靜慮障，見味靜慮德，
毀謗聲聞乘，有自法勤彼。
勤非勤外論，精勤復愛樂，
誹謗大乘法，自讚而毀他。
不往聽聞法，毀師但依文，
須伴不往助，不供事病人。
不救拔眾苦，不誨諸放逸，
於恩不報恩，不解他愁惱。
不施求財者，不利諸徒眾，
不隨他心轉，不讚揚功德。
不稱緣降伏，不現通怖攝。
具哀愍慈愛，及善心無犯。